



Dapi 1979 figurescha l'architect Francesco Borromini (1598–1667) sin la bancnota da tschient francs. Da questa seria èn anc notas en la valita d'ina milliarda en circulaziun.

MAD

Abolir termin per stgamiar las notas veglias

Cussegl naziunal s'exprima persuerter

■ (sda/anr) **Bancnotas veglias duain ins pudair stgamiar pli ditg. Il cussegl naziunal vul abolir il termin da scadenza – betg uschia la chombra pitschna.** Cun 106 cunter 75 vuschs ha il cussegl naziunal dà suatientscha ier a sia cumissiuin. Il stgomi illimità duai valair a partir da la sisavla seria ch'è vegnida en circulaziun il 1979. Sin la nota da tschient paradescha in purtret da l'architect Francesco Borromini. Da questa seria èn anc notas en la valita dad ina milliarda francs en circulaziun, sco il minister da finanzas *Ueli Maurer* ha ditg. Il termin da stgamiar questas notas scada il matg 2020.

Betg pli convegnent

Ord vista da la maiorità n'è ina scadenza betg pli convegnenta. I na saja betg pli chapibel che bancnotas perdian – cuntrari a la munaida – suenter in tschert termin tuttenina lur valita, ha ditg il pledader da cumissiuin.

Il cussegl federal fa attent en ses mesadi al parlament a la pli lunga durada da vita ed a las reglas en auters pajais. Bancnotas dad impurtantas valutas interna-

ziunalas possian vegnir stgamiadas senza termin da scadenza.

Il cussegl dals chantuns aveva en la sessiun d'enviern refusà dad abolir la scadenza. La maiorità ha gù tema ch'il ristg da criminalità creschia sche bancnotas veglias dastgian vegnir stgamiadas senza limita da temp.

Il cussegl federal n'enconuscha betg talas resalvas: Suenter il reclom dastgian ins anc pajar sis mais cun bancnotas veglias. Suenter stoppian ins stgamiar questas notas ad in spurtegl da la Banca Naziunala Svizra che po examinar la vardad e derivanza.

Sanesters, verds e pcd s'opponan

Ina minorità da representants da la ps, dals verds e da la pcd è s'opponida ier en il cussegl naziunal encunter l'aboli-ziun da la scadenza. Notas veglias sajan anc adina sutpostas per far daners fauss u per la lavada da daners, ha ditg *Beat Jans* (ps/BS). I saja perquai inditgà da mantegnair la scadenza. *Leo Müller* (pcd/LU) ha constatà ch'i na dettia atgnamain nagins problems cun las reglas actualas.